

MULABDIĆ NEDŽIB - geodeta

1. augusta 1994. godine, umro je u 88. godini života Mulabdić Nedžib, najstariji geometar u Bosni i Hercegovini.

Njegov životni put, veliki doprinos što ga je dao društvu, a nadasve vrline koje su ga krasile, povod su da se o ovom dobrom i zaslužnom čovjeku nešto više kaže.

Rođen je 1905. godine u uglednoj građanskoj porodici u Foči. Nakon završene osnovne škole u rodnom gradu i gimnazije u Sarajevu, nastavio je školovanje na Tehničkoj školi u Beogradu i 1926. godine stekao diplomu geometra. To je bila druga generacija svršenih geometara u Jugoslaviji.

Nakon završenog školovanja zaposlio se u Generalnoj direkciji katastra i državnih dobara u Beogradu i upućen na radove katastarskog premjera u Srbiji. Radio je u više mjesta, u prvo vrijeme na operativnim poslovima, a potom kao šef sekcije i instruktor. Na tim poslovima radio je do 1945. godine, odnosno do oslobođenja zemlje.

Kada se Vlada Republike Albanije, koja je bila deficitarna u stručnim kadrovima, obratila Vladi Jugoslavije za pomoć radi obnove u ratu porušene zemlje, Nedžib je bio među prvim stručnjacima koji su upućeni u Albaniju. U Albaniji je radio od 1945. do 1947. godine u prvo vrijeme na sprovođenju agrarne reforme, a zatim u Komisiji za utvrđivanje državne granice između Jugoslavije i Albanije. Njegovo angažovanje na ovim odgovornim poslovima, dokaz je povjerenja ne samo u njegove stručne nego i moralno političke kvalitete. Za uspješan rad dobio je od Albanske vlade visoko priznanje.

Po povratku iz Albanije došao je u Bosnu i Hercegovinu. Najviše vremena proveo je na radu u Republičkoj geodetskoj upravi kao inspektor, gdje je ostao do kraja radnog vijeka.

Za ovaj rad dobio je značajna društvena priznanja, među kojima i Orden zasluga za narod i Orden rada Republike Albanije. Bio je učesnik NOR-a. Imao je sreden porodični život. Bio je uzoran muž i otac. Zbog svog drugarskog i toplog odnosa sa ljudima bio je cijenjen i omiljen, ukratko bio je doajen geometara u BiH.

Njegovom smrću svi smo mnogo izgubili, u prvom redu njegova porodica i njegove kolege, koje će ga se dugo sjećati i spominjati.

Salih Kabil